

also roh eyngeuegen wirt/bleibets Golt noch besser ganz/solch probiren aber geschicht also. Wann du das Silber abgewegen hast/so geuß darauff gar ein schwach Scheidwasser/welches dz Silber nit wol angreifen kan/vnd setze es mit dem Kõlblein vber ein Kolfewerlein zu solviren/wie gebräuchlichen/vnd thue im ziemlich heiß / also dz auch das Scheidwasser mit grossen Blasen arbeitet / vnd fast oben außseudet. Das solviren thu so lang/bisz dein eyngeuegen Silber fast gar solviret ist. Damit es aber besser hilff hab/so geuß (wann das Silber etwas mehr dann halb solviret ist) new vnd ein wenig stärker Scheidwasser ins Kõlblein/so solviret sich das Silber rein auß/vnd reißt nicht mehr/ob gleich zum andern mal/starck Scheidwasser darauff gegossen wirt/sondern was es thut das geschicht erstlich. Dieses ist wol ein feiner weg/durch den das Golt fein dicht / kornlein weiß beyssammen bleibt/aber es wil etwas viel lenger zeit haben/als das ander gemeine probiren/hab des hiemit also gedenccken wõllen / damit man sehe/das andere weg mehr zu solchem probirn seynd.

## Das goldische Silber durch das Wasserwegen zu Probirn.

**N**ach kan ich fernier zu berichten nicht vnterlassen/das die alten Künstler/vnd Naturkündiger/die Silber auch durch ein gemein fließend Wasser probirt/vnd im wegen erkannt haben/ob sie reich oder arm am Golt gewesen. Diese ihre erfindung / weil sie auß rechten natürlichen vrsachen herkömpt/laß ich mir gefallen/vnd ein feines nachdencken seyn / zu vielen andern sachen dienstlichen. Es geschicht aber das Silber im Wasserwegen also: Nim eine Wag / vnd leg in die eine Schale das goldige Silber / vnd in die ander Schal so viel Silber / das kein Golt helt/daß sie gleicher schwer werden/senck alsdann beyde Schalen zu gleich mit einander in ein Schaff voll rein Wasser/so wirst du befinden/vnd augenscheinlich sehen/daß das Silber/wann es goldisch ist/im Wasser ein Aufschlag wirt gewinnen / doch vñ so viel nicht/als das Silber Golt in sich hat. Die vrsach solches vnterscheidts kömpt daher/die weil das Golt in gleicher groß/die andern Metallen mit seiner schweren alle obertrifft/vnd das schwerste Metall ist/so kan solches/wie ein jeder selbest vrtheilen kan/im Wasser nicht so leichtlich schwimmen/sondern muß viel ehe zu grund sincken / als die so leichter seyn. Wie der gleichen